

গণপ্রজাতন্ত্রী বাংলাদেশ সরকার
তথ্য অধিদফতর
বাংলাদেশ সচিবালয়
ঢাকা।

সংবাদ গতিধারা

ঢাকা, বুধবার ৯ ডিসেম্বর ২০১৫, ২৫ অগ্রহায়ণ ১৪২২

আজকের দৈনিক পত্রিকাগুলো নিম্নলিখিত বিষয়গুলোকে প্রাধান্য দিয়ে খবর ছেপেছে :

- ১। সকল অমীমাংসিত সমস্যার শীঘ্রই সমাধান
: ভারতের বিদায়ী হাইকমিশনারের সাক্ষাৎকালে রাষ্ট্রপতি
- ২। দারিদ্র্য লালনের ক্ষুদ্রঋণ প্রকল্প আর নয় : প্রধানমন্ত্রী
- একনেকে সিঙ্গেল মুরিং টার্মিনালসহ ১০ প্রকল্প অনুমোদন
- ৩। এক সপ্তাহের মধ্যে নতুন বেতন কাঠামো কার্যকরে আদেশ জারি হবে : অর্থমন্ত্রী
- ৪। নারীর প্রতি সহিংসতা রোধে সম্মিলিত প্রয়াস জরুরি : ঢাকায় ৯ নারী রাষ্ট্রদূত
- বেগম রোকেয়া দিবস আজ : এ উপলক্ষে রাষ্ট্রপতি ও প্রধানমন্ত্রী পৃথক বাণী দিয়েছেন
- ৫। 'স্বাস্থ্যমন্ত্রী জাতীয় পুরস্কার' পেল ৩৬ সরকারি হাসপাতাল
-স্বাস্থ্যখাতে অনিয়ম নয় : স্বাস্থ্যমন্ত্রী
- ৬। জাপানি নাগরিক হোশি কোনিও হত্যার মূল হোতা গ্রেপ্তার
- ৭। সার্কভুক্ত দেশগুলোর মধ্যে বাণিজ্য বাড়াতে অভিন্ন মান ব্যবস্থা গড়ার তাগিদ
- ৮। আন্তর্জাতিক দুর্নীতি বিরোধী দিবস আজ
- ৯। ভিটামিন 'এ' সমৃদ্ধ ভোজ্যতেল নিশ্চিত বিশেষ অভিযান
- ১০। হযরত শাহজালাল আন্তর্জাতিক বিমানবন্দরে ৯ কোটি টাকার স্বর্ণ আটক
- তিন কেজি কোকেনসহ স্পেনের নাগরিক গ্রেপ্তার
- ১১। মতিউর রহমান নিজামীর আপিলের রায় ৬ জানুয়ারি

১। সকল অমীমাংসিত সমস্যার শীঘ্রই সমাধান : ভারতের বিদায়ী হাইকমিশনারের সাক্ষাৎকালে রাষ্ট্রপতি রাষ্ট্রপতি মো. আবদুল হামিদ বলেছেন, স্থল সীমান্ত চুক্তি বাস্তবায়ন বাংলাদেশ ও ভারতের মধ্যকার সম্পর্ক ত্বরান্বিত করেছে। দু'দেশের মধ্যকার সকল অমীমাংসিত ইস্যু শীঘ্রই সমাধান হবে বলে তিনি আশা প্রকাশ করেন। বাংলাদেশে নিযুক্ত ভারতের হাইকমিশনার পঙ্কজ শরণ গতকাল ৮ ডিসেম্বর মঙ্গলবার বঙ্গভবনে রাষ্ট্রপতি মো. আবদুল হামিদের সঙ্গে বিদায়ী সাক্ষাৎ করতে গেলে তিনি একথা বলেন। সূত্র-জনকণ্ঠ (শেষ পৃ.,ক.২), প্রথম আলো (পৃ.২,ক.৫), ডেইলি স্টার (পৃ.৩,ক.৩), নিউ এজ (শেষ পৃ.,ক.৭)।

২। দারিদ্র্য লাগনের ক্ষুদ্রঋণ প্রকল্প আর নয় : প্রধানমন্ত্রী

- একনেকে সিঙ্গেল মুরিং টার্মিনালসহ ১০ প্রকল্প অনুমোদন

একনেক বৈঠকে প্রধানমন্ত্রী শেখ হাসিনা বলেছেন, এখন থেকে ক্ষুদ্র ঋণবিষয়ক কোনো প্রকল্প হাতে নেওয়া যাবে না। কেননা মানুষ ঋণ নেয় কিন্তু শোধ করতে পারে না। ফলে আবারও ঋণ নেয়, এভাবে তারা ঋণের জালে আটকে যায়। আর বের হতে পারে না। আমি দেশের মানুষকে এই ঋণের জালে আটকাতে চাই না। তাই এখন থেকে মাইক্রোক্রেডিট নয়, হবে মাইক্রো ফাইন্যান্স এবং মাইক্রো সেভিংস। সূত্র-জনকণ্ঠ (পৃ.১,ক.২), ইন্ডেফাক (পৃ.১,ক.৫), ইনকিলাব (শেষ পৃ.,ক.৬), ফিনানশিয়াল এক্সপ্রেস (শেষ পৃ.,ক.১), ডেইলি সান (শেষ পৃ.,ক.২)।

এদিকে চট্টগ্রামে দেশের প্রথম সিঙ্গেল মুরিং টার্মিনাল তৈরিসহ দশটি প্রকল্প অনুমোদন দিয়েছে জাতীয় অর্থনৈতিক পরিষদের নির্বাহী কমিটি (একনেক)। এগুলো বাস্তবায়নে মোট ব্যয় হবে ৭ হাজার ২৭৬ কোটি ৩৬ লাখ টাকা। এরমধ্যে সরকারের নিজস্ব তহবিল থেকে ১ হাজার ৯১৮ কোটি ৬৫ লাখ, বৈদেশিক সহায়তা থেকে ৪ হাজার ৭৫৫ কোটি ১১ লাখ এবং বাস্তবায়নকারী সংস্থার নিজস্ব তহবিল থেকে ৬০২ কোটি ৬০ লাখ টাকা ব্যয় করা হবে। গতকাল ৮ ডিসেম্বর মঙ্গলবার রাজধানীর শেরেবাংলা নগরের এনইসি সম্মেলনকক্ষে অনুষ্ঠিত বৈঠকে এ অনুমোদন দেওয়া হয়। এতে সভাপতিত্ব করেন প্রধানমন্ত্রী ও একনেক চেয়ারপার্সন শেখ হাসিনা। সূত্র-জনকণ্ঠ (পৃ.১,ক.২)।

৩। এক সপ্তাহের মধ্যে নতুন বেতন কাঠামো কার্যকরে আদেশ জারি হবে : অর্থমন্ত্রী

অর্থমন্ত্রী আবুল মাল আবদুল মুহিত বলেছেন আগামী এক সপ্তাহের মধ্যেই নতুন বেতন কাঠামো কার্যকরের আদেশ জারি হবে। বেতন কাঠামো কার্যকরের আদেশ আইন মন্ত্রণালয়ে অপেক্ষমাণ রয়েছে। আজকালের মধ্যে তা অর্থ মন্ত্রণালয়ে আসবে। এর পরই আদেশ জারি হবে। এবারই শেষ পে-স্কেল, পরবর্তীতে নতুন করে কোনো পে-স্কেল গঠন করা হবে না জানিয়ে মন্ত্রী বলেন, বিশ্বের অন্য দেশের মতো পরবর্তী পাঁচ বছর অন্তর অন্তর সরকারি কর্মকর্তা-কর্মচারীদের বেতন-ভাতা বাড়ার একটি নির্দেশনা থাকবে। গতকাল ৮ ডিসেম্বর মঙ্গলবার সিলেট সার্কিট হাউসে সাংবাদিকদের সঙ্গে মতবিনিময়ে জাতীয় ইস্যুতে মন্ত্রী এসব কথা বলেন। সূত্র-জনকণ্ঠ (পৃ.১,ক.৭), প্রথম আলো (পৃ.৩,ক.৫), সংবাদ (পৃ.১,ক.৮), ফিনানশিয়াল এক্সপ্রেস (পৃ.১,ক.৫), ইন্ডিপেনডেন্ট (শেষ পৃ.,ক.৭)।

৪। নারীর প্রতি সহিংসতা রোধে সম্মিলিত প্রয়াস জরুরি : ঢাকায় ৯ নারী রাষ্ট্রদূত

- বেগম রোকেয়া দিবস আজ : এ উপলক্ষে রাষ্ট্রপতি ও প্রধানমন্ত্রী পৃথক বাণী দিয়েছেন

বাংলাদেশে নিযুক্ত নয়টি দেশের নারী রাষ্ট্রদূত একমত হয়েছেন যে, তাদের দেশে এবং বাংলাদেশে নারীর প্রতি সহিংসতার বিরুদ্ধে সাড়া দেওয়া ও সহিংসতা প্রতিরোধের প্রয়োজনীয়তা জরুরি ভিত্তিতে আমলে নেওয়া উচিত। গতকাল ৮ ডিসেম্বর মঙ্গলবার ঢাকার যুক্তরাষ্ট্র দূতবাসের পাঠানো এক বিবৃতিতে এ কথা জানানো হয়। সূত্র-সংবাদ (পৃ.১,ক.৬), জনকণ্ঠ (শেষ পৃ.,ক.৪), ডেইলি সান (পৃ.১,ক.১), নিউজ টুডে (শেষ পৃ.,ক.৬)।

আজ ৯ ডিসেম্বর বুধবার বেগম রোকেয়া দিবস। বাংলার নারী জাগরণের অগ্রদূত বেগম রোকেয়ার ১৩৫তম জন্ম ও ৮৩তম মৃত্যুবার্ষিকী। দিনটি উপলক্ষে সরকারি-বেসরকারি পর্যায়ে নানা কর্মসূচির আয়োজন করা হয়েছে। রাষ্ট্রপতি মো. আবদুল হামিদ ও প্রধানমন্ত্রী শেখ হাসিনা এ উপলক্ষে পৃথক বাণী দিয়েছেন। সূত্র-প্রথম আলো (পৃ.২,ক.৮), সমকাল (শেষ পৃ.,ক.১), সংবাদ (পৃ.১,ক.৬), ডেইলি স্টার (পৃ.৩,ক.৮), নিউ এজ (শেষ পৃ.,ক.১)।

৫। 'স্বাস্থ্যমন্ত্রী জাতীয় পুরস্কার' পেল ৩৬ সরকারি হাসপাতাল

-স্বাস্থ্যখাতে অনিয়ম নয় : স্বাস্থ্যমন্ত্রী

স্বাস্থ্য ও পরিবার কল্যাণ মন্ত্রী মোহাম্মদ নাসিম বলেছেন, স্বাস্থ্যখাতে দুর্নীতি ও অনিয়ম কোনোভাবেই প্রশ্রয় দেওয়া হবে না। একই সঙ্গে যেসব হাসপাতাল স্বাস্থ্যসেবার গুণগত মান নিশ্চিত করতে পারবে না তাদের

বিরুদ্ধে শাস্তিমূলক ব্যবস্থা নেওয়া হবে। সিভিল সার্জনদের নিজ নিজ জেলার হাসপাতালগুলোতে চিকিৎসকদের উপস্থিতি নিশ্চিতকরণ মনিটরিংয়ের নির্দেশ দেন তিনি। গতকাল ৮ ডিসেম্বর মঙ্গলবার প্যান প্যাসিফিক হোটেল সোনারগাঁওয়ে স্বাস্থ্যমন্ত্রী জাতীয় পুরস্কার ২০১৫ প্রদান অনুষ্ঠানে প্রধান অতিথির বক্তব্যে তিনি এসব কথা বলেন। সূত্র-ইত্তেফাক (শেষ পৃ.,ক.৫), সমকাল (পৃ.২,ক.৫), জনকণ্ঠ (পৃ.১৯,ক.১)।

৬। জাপানি নাগরিক হোশি কোনিও হত্যার মূল হোতা গ্রেপ্তার

রংপুরে জাপানি নাগরিক হোশি কোনিও ও কাউনিয়ায় আওয়ামী লীগ নেতা হত্যা এবং বাহাই সম্প্রদায়ের নেতার ওপর হামলার ঘটনার মূল হোতা মাসুদ রানাকে রংপুরের পীরগাছা থেকে গ্রেপ্তার করা হয়েছে। গ্রেপ্তারকৃত মাসুদ নিষিদ্ধ ঘোষিত (জেএমবি)'র সদস্য বলে জানিয়েছে পুলিশ। এ বিষয়ে গতকাল ৮ ডিসেম্বর মঙ্গলবার দুপুরে রংপুর রেঞ্জের ডিআইজি তদন্ত কমিটির প্রধান হুমায়ুন কবির তার কার্যালয়ে সাংবাদিকদের ব্রিফিং করেন। সূত্র-ইনকিলাব (পৃ.১,ক.৫), সংবাদ (পৃ.১,ক.২), সমকাল (শেষ পৃ.,ক.৫), ডেইলি স্টার (পৃ.১,ক.১), ইন্ডিপেনডেন্ট (পৃ.১,ক.১)। প্রথম আলো এ বিষয়ে লিড নিউজ ছেপেছে।

৭। সার্কভুক্ত দেশগুলোর মধ্যে বাণিজ্য বাড়াতে অভিন্ন মান ব্যবস্থা গড়ার তাগিদ

সার্কভুক্ত দেশগুলোর মধ্যে আন্তঃবাণিজ্য বাড়াতে পণ্য ও সেবার অভিন্ন মান ব্যবস্থা গড়ে তোলার তাগিদ দিয়েছেন বক্তারা। তারা বলেন, সার্ক অঞ্চলে ১ দশমিক ৭ বিলিয়ন মানুষ বাস করলেও বর্তমানে দেশগুলোর মধ্যে আন্তঃবাণিজ্যের পরিমাণ সম্মিলিত রপ্তানির মাত্র ৫ শতাংশ। পণ্য ও সেবার গুণগত মান বাড়িয়ে সার্কভুক্ত দেশগুলো নিজেদের মধ্যে বাণিজ্য বৃদ্ধির পাশাপাশি বিশ্ববাজারে রপ্তানির প্রতিযোগিতায় সক্ষমতা অর্জন করতে পারে। গতকাল ৮ ডিসেম্বর মঙ্গলবার সার্কের ৩১তম প্রতিষ্ঠা বার্ষিকী উপলক্ষে দক্ষিণ এশিয়ার আঞ্চলিক মান সংস্থা আয়োজিত আলোচনা সভায় বক্তারা এ কথা বলেন। রাজধানীর তেজগাঁওয়ে সারসো ভবনে এ সভা অনুষ্ঠিত হয়। শিল্পমন্ত্রী আমির হোসেন আমু এতে প্রধান অতিথি হিসেবে উপস্থিত ছিলেন। সূত্র-যুগান্তর (পৃ.৯,ক.৩), প্রথম আলো (পৃ.১৩,ক.৮), ডেইলি অবজারভার (শেষ পৃ.,ক.১)।

৮। আন্তর্জাতিক দুর্নীতি বিরোধী দিবস আজ

আজ আন্তর্জাতিক দুর্নীতি বিরোধী দিবস। 'জাহত বিবেক, দুর্জয় তারুণ্য-দুর্নীতি রুখবেই' এই প্রতিপাদ্য নিয়ে এ বছর দিবসটি উদযাপন করছে ট্রান্সপারেন্সি ইন্টারন্যাশনাল বাংলাদেশ (টিআইবি)। দুর্নীতিকে বৈশ্বিক সমস্যা হিসেবে চিহ্নিত করে এর নিয়ন্ত্রণ ও প্রতিরোধে সক্রিয় এবং কার্যকর কর্মপন্থা নির্ণয়ে জাতিসংঘের উদ্যোগে ২০০৩ সালের ৩১ অক্টোবর আন্তর্জাতিক দুর্নীতি বিরোধী সনদ গৃহীত হয়। সূত্র-সংবাদ (পৃ.১,ক.৮), প্রথম আলো (পৃ.১,ক.৫), নিউ নেশন (শেষ পৃ.,ক.৫), নিউজ টুডে (পৃ.২,ক.১)।

৯। ভিটামিন 'এ' সমৃদ্ধ ভোজ্যতেল নিশ্চিত বিশেষ অভিযান

ভোজ্য পর্যায়ে শতভাগ ভিটামিন 'এ' সমৃদ্ধ ভোজ্যতেল সরবরাহ নিশ্চিত করতে শিগগিরই বিএসটিআইর নেতৃত্বে বিশেষ অভিযান পরিচালনা করা হবে বলে জানিয়েছেন শিল্প সচিব মো. মোশাররফ হোসেন ভূঁইয়া। তিনি বলেন, ভোজ্যতেলে ভিটামিন-এ সমৃদ্ধকরণ আইন, ২০১৩ এর আলোকে এ অভিযান পরিচালনা করা হবে। সূত্র-যুগান্তর (পৃ.৯,ক.২), প্রথম আলো (পৃ.১৩,ক.৫), সংবাদ (পৃ.১৪,ক.২)।

১০। হযরত শাহজালাল আন্তর্জাতিক বিমানবন্দরে ৯ কোটি টাকার স্বর্ণ আটক

- তিন কেজি কোকেনসহ স্পেনের নাগরিক গ্রেপ্তার

হযরত শাহজালাল আন্তর্জাতিক বিমানবন্দর থেকে ১৮ কেজি ৬৫ গ্রাম ওজনের স্বর্ণের বার আটক করেছে শুক্ক গোয়েন্দা ও তদন্ত অধিদফতর, যার বাজার মূল্য প্রায় ৯ কোটি টাকা। গত ৭ ডিসেম্বর সোমবার রাত সাড়ে ১১টার দিকে স্বর্ণগুলো উদ্ধার করা হয়। শুক্ক গোয়েন্দা ও তদন্ত অধিদপ্তরের মহাপরিচালক ড. মইনুল খান জানান এমএইচ-১৯৬ নম্বর মালয়েশিয়ান এয়ারলাইন্সের একটি বিমান থেকে স্বর্ণগুলো উদ্ধার করা হয়। এর সঙ্গে জড়িত কাউকে আটক করা যায়নি বলেও জানান তিনি। তবে জড়িতদের ধরতে অভিযান চলছে। সূত্র-সংবাদ (শেষ পৃ.,ক.৫), প্রথম আলো (শেষ পৃ.,ক.৮), সংবাদ (শেষ পৃ.,ক.৫), ফিন্যানশিয়াল এক্সপ্রেস (পৃ.১,ক.১), ডেইলি সান (পৃ.২,ক.৫)।

এছাড়া হযরত শাহজালাল আন্তর্জাতিক বিমানবন্দর থেকে তিন কেজি কোকেনসহ স্পেনের একজন নাগরিককে গ্রেপ্তার করেছেন মাদকদ্রব্য নিয়ন্ত্রণ অধিদপ্তরের কর্মকর্তারা। গ্রেপ্তার স্প্যানিশ নাগরিকের নাম বি পি জুলিয়ান। উদ্ধার হওয়া কোকেনের দাম প্রায় ৬০ কোটি টাকা। সূত্র-প্রথম আলো (শেষ পৃ.,ক.৮)।

১১। মতিউর রহমান নিজামীর আপিলের রায় ৬ জানুয়ারি

যুদ্ধাপরাধ ট্রাইব্যুনালের ফাঁসির রায়ের বিরুদ্ধে জামায়াত নেতা মতিউর রহমান নিজামীর আপিলের রায় ৬ জানুয়ারি ঘোষণা করবে সুপ্রিম কোর্টের আপিল বিভাগ। আসামি ও রাষ্ট্রপক্ষের আইনজীবীদের শুনানি গ্রহণ করে প্রধান বিচারপতি সুরেন্দ্র কুমার সিনহার নেতৃত্বাধীন আপিল বিভাগের চার বিচারপতির বেঞ্চ গতকাল ৮ ডিসেম্বর মঙ্গলবার রায় ঘোষণার জন্য এ দিন ধার্য করে দেন। সূত্র-ইত্তেফাক (পৃ.১,ক.৮), প্রথম আলো (পৃ.১,ক.৮), জনকণ্ঠ (পৃ.১,ক.২), ডেইলি স্টার (শেষ পৃ.,ক.৮), ইন্ডিপেনডেন্ট (পৃ.১,ক.১)।

সম্পাদকীয়

- ক. প্রথম আলো : অর্ধবছরের প্রায় ছয় মাস পার হতে চললেও বার্ষিক উন্নয়ন পরিকল্পনার বাস্তবায়নের হার খুবই মন্থর হওয়ার চিত্র তুলে ধরে উন্নয়ন প্রকল্প নিয়ে টালবাহানা না করে, প্রকল্পের সংখ্যা না বাড়িয়ে গৃহীত প্রকল্পগুলো বাস্তবায়নের দিকেই কর্তৃপক্ষকে মনোযোগী হওয়ার আহ্বান;
- খ. ইত্তেফাক, সংবাদ : আসন্ন পৌরসভা নির্বাচনে নারী প্রার্থীদের জন্য রাখা লিঙ্গ বৈষম্যমূলক নির্বাচনী প্রতীকগুলোর সমালোচনা করে নির্বাচন কমিশনকে প্রতীক বরাদ্দ সংক্রান্ত ভুলের সংশোধন করার সুপারিশ;
- গ. সংবাদ : প্রবাসী শ্রমিকদের মাধ্যমে অধিকতর রেমিট্যান্স আনতে হলে শিক্ষিত ও প্রশিক্ষিত দক্ষ জনশক্তি বিদেশে পাঠানোর বিকল্প নেই বলে অভিমত;
- ঘ. জনকণ্ঠ : জাফলং থেকে অপরিষ্কৃত ও অবৈধ উপায়ে পাথর উত্তোলন বন্ধে জরুরিভিত্তিতে বিশেষ কার্যক্রম পরিচালনা করাসহ দায়ীদের বিরুদ্ধে আইনানুযায়ী ব্যবস্থা গ্রহণের সুপারিশ;
- ঙ. সমকাল, ডেইলি অবজারভার : বাংলাদেশের কক্সবাজারের কুতুবদিয়া দ্বীপ নিয়ে এএফপি'র প্রচারিত প্রতিবেদনের উল্লেখ করে জলবায়ু পরিবর্তনে কুতুবদিয়া যেন হারিয়ে না যায় সে ব্যাপারে উন্নত দেশগুলোকে প্রযুক্তি ও আর্থিক সহায়তা দিয়ে আন্তরিকতার সঙ্গে এগিয়ে আসার আহ্বান;
- চ. ইনকিলাব, ভোরের কাগজ, প্রথম আলো, ডেইলি স্টার, নিউ এজ : দেশের সড়ক মহাসড়কগুলোতে যানবাহন চলাচল নির্বিঘ্ন ও নিরাপদ রাখার বিষয়ে হাইকোর্টের নির্দেশ যথাযথভাবে বাস্তবায়নের উদ্যোগ নেওয়ার সুপারিশ;
- ছ. ইন্ডিপেনডেন্ট : জোরপূর্বক অপহরণ করা লোকদের পরিবারের দুর্ভোগ বিবেচনায় নিয়ে এ ব্যাপারে ন্যায় বিচার প্রাপ্তি নিশ্চিত করার আহ্বান;
- জ. ডেইলি সান : দরিদ্র পরিবারের সন্তানরা পরিবারের আর্থিক সহায়তায় অল্প বয়সে কাজে জড়িয়ে পড়ায় তাদের শৈশব হারিয়ে যায় উল্লেখ করে এসব বাচ্চাদের স্কুলে যাওয়ার সুযোগ তৈরি করে দেওয়ার ওপর গুরুত্বারোপ;
- ঝ. নিউ এজ : জেনেটিক্যালি মোডিফাইড জিএম বীজ দেশের ভূপ্রকৃতিতে ক্ষতিকর প্রভাব ফেলতে পারে আশঙ্কা করে জাতীয় স্বার্থে চীন ও ভারত থেকে তুলার জিএম সিড না আনার ব্যাপারে সমাজের সচেতন নাগরিকদের সরকারকে বাধ্য করার ব্যাপারে এগিয়ে আসার আহ্বান;
- ঞ. নিউ নেশন, যায়যায়দিন : স্বাস্থ্যসেবার ব্যয় বেড়ে যাওয়ায় দরিদ্র জনগোষ্ঠী এ সেবা থেকে বঞ্চিত হওয়ার আশঙ্কা করে গরিব মানুষ যেন কম খরচে চিকিৎসাসেবা পায় সরকারকে তার ব্যবস্থা করার সুপারিশ জানিয়ে সম্পাদকীয় প্রকাশ করেছে।

উপ-সম্পাদকীয়

প্রথম আলো পত্রিকায় প্রকাশিত কলামে বর্তমান গণতান্ত্রিক বিশ্বে নির্বাচনী শাসন ব্যবস্থায় শরিকদের ভূমিকা অত্যন্ত গুরুত্বপূর্ণ বলে উল্লেখ করা হয়েছে।

নিবন্ধ ও ফিচার

যায়যায়দিন পত্রিকায় প্রকাশিত 'ভেজাল ওষুধে বাজার সয়লাব ঝুঁকির মধ্যে জনস্বাস্থ্য' শিরোনামের নিবন্ধে হেলেনা জাহাঙ্গীর যারা ভেজাল ওষুধ তৈরির মাধ্যমে মানুষের জীবনকে ঝুঁকির মধ্যে ঠেলে দিয়েছে তাদের মদদদানকারীদের আইনের আওতায় আনতে হবে বলে অভিমত প্রকাশ করেছেন।

#